

2 TIMOTI

¹ E Pol. Kristus Yesus na e qarınbej deqa e aqa anjam mare mare laqnum. Qotei aqa segi areqalo na e wau di ebej deqa e na tamo unğasari nanđi endegsi minjreqnum, “Ninđi Kristus Yesus qa nunđo areqalo sinđilatqab di ninđi nambile oqab.” Nambile di Qotei a nami iga egwa marej.

² O Timoti, ni ijo anđro bole bulonum. E anjam endi nenđrenyosim inoq qarınyonum. Tamo Koba Kristus Yesus aqa Abu Qotei wo nanđi aiyel ni qa dulosis are boleınjrimqa ni lawo na soqnime.

Iga Yesus aqa anjam bole qa jemaigwasai

³ Ijo moma nanđi nami Qotei aqa wau ojoqneb dego kere e bini Qotei aqa wau ojeqnum. Ijo moma nanđo are miligiq di nanđi qalieeb, nanđi Qotei aqa nıangalaq di une saiqoji soqneb. E segi dego ijo are miligiq di degsi qalieonum. Deqa Timoti, e qolo ti qanam ti Qotei pailyoqnsim ni qa are qaloqnsim Qotei binıyeqnum.

⁴ Nami e ni uratmqa laqnamqa ni e qa are ugeimonaqa akamem. E deqa are qaloqnsim ni olo numqajqa are koba unu. E ni numsiyqa tulan areboleboleibqas.

⁵ Nami ino moma Lois wo ino ai Yunis wo nanđi aiyel Yesus qa nanđo areqalo sinđilatoqneb dego kere bini ni Yesus qa ino areqalo sinđilateqnum. Utru deqa e ni numqajqa are qaloqnsim unum.

⁶ Nami e ijo ban ino gateq di atnamqa Qotei na ni aqa wau ojıajqa deqa sinđila emej. Deqa e ino areqalo tigeltetmitqa ni sinđila deqa olo are

qaloqnsim wau di singilatoqne. Tamo a nam puyim puloŋosim kobaqas dego kere ni ino wau di olo singilatim kobaqas.

⁷ Ni qalie, Qotei na iga ulaqajqa deqa aqa Mondor egosai. Iga singila ti qalaqalaiyo kumbra ti areqalo bole ti sqajqa deqa osiq aqa Mondor egej.

⁸ Deqa ni gago Tamo Koba aqa anjam qa jemaimaiq. Ni e qa dego jemaimaiq. E Yesus aqa anjam mare mare laqnem deqa jeu tamo nanŋi na e ojsib tonto talq endi waibeb unum. Deqa ni na e beterbosim Qotei aqa singila ti sosim Yesus aqa anjam bole mare mare laqne. Osim dena ni e ombla gulbe oqnsim sqom.

⁹ Qotei na iga elenosiqa iga aqa segi kumbra boleq di sqajqa deqa are qalsiq metgej. Iga wau bole bole yoqnem Qotei a deqa osiq iga metgosai. Tulaŋ nami a inŋi inŋi kalil atosaisosiqa a aqa segi areqalo na iga metgej. Osiqa iga qa are boleiyosiqa Kristus Yesus qarinyosiq dena iga elenjej.

¹⁰ Bati kereonaqa Kristus Yesus agi iga elenjej qaji a boleq dosiqa moiyo aqa singila kobotej. Aqa kumbra dena Qotei a iga qa are boleiyej. E Yesus aqa anjam bole mare mare laqnum gam dena tamo ungasari nanŋi endegsi poinjreŋnu, “Bole, iga moiqasai. Iga nambile gaigai sqom.”

¹¹ E Yesus aqa anjam bole palontqajqa ti plaltqajqa ti deqa Qotei na e giltbej.

¹² Deqa unŋum, e gulbe oqnsiy sqai. E deqa jemaibqasai. E Yesus qa ijo areqalo singilateqnum. E a qa qalie bole. A e wau ebej deqa e qalieonum, a na wau di geregere taqatoqnsim gilsim a olo bqajqa bati brantqas.

¹³ O Timoti, anjam bole kalil e nami ni mermoqnem qaji di ni geregere dauryoqnsim palontoqne. Osim Kristus Yesus qa ino areqalo singilatoqnsim a qalaqalaiyoqne.

¹⁴ Qotei na aqa anjam bole di ino banq di atej. Anjam di tulañ bolequja. Deqa ni anjam di geregere taqatesoqne. Mondor Bole agi gago are miligiq di unu qaji a na ni aqaryaimoqnimqa ni Qotei aqa wau geregere ojsim laqne.

¹⁵ Ni qalie, tamo kalil Esia sawaq di unub qaji nanqi e uratbosib jaraiyeb. Figelus Hermogenes wo nanqi aiyel dego e uratbosib jaraiyeb.

¹⁶ E endegsi pailyeqnum, “O Tamo Koba, ni Onesiforus aqa tal qujai nanqi qa dulame.” O Timoti, Onesiforus a bati gargekoba ijo are boletetboqnej. E tonto talq di soqnem bati deqa a e qa jemaiyosai.

¹⁷ A Rom qureq bosiq dia e qa namosiq itbej.

¹⁸ Deqa e a qa endegsi pailyeqnum, “O Tamo Koba, mondoni ni na tamo ungasari nanqi peginjrqqa batiamqa ni Onesiforus a qa dulame.” O Timoti, nami Efesus qureq di dego Onesiforus a e qa wau gargekoba yoqnsiqa aqaryaiboqnej. Di ni qalie.

2

Pol na Timoti minjej, “Ni Yesus aqa qoto tamo bulosim gulbe qoboiyesoqne”

¹ O ijo angro Timoti, Kristus Yesus a iga qa are boleiyeqnu aqa kumbra dena ni singilatmoqneme.

² E tamo gargekoba nanqo namgalaq di Qotei aqa anjam palontoqnem di ni quoqnem. Anjam di ni na olo tamo qudei Yesus bole dauryeqnub

qaji nanġi deġo minjroqnimq̄a nanġi kamba tamo q̄udei nanġi minjroq̄nq̄ab.

³ Ni e ombla Kristus Yesus aq̄a q̄oto tamo bulosim gulbe q̄oboiyesoq̄ne.

⁴ Qoto tamo nanġo kumbra di ni q̄alie. Nanġi q̄otq̄ajq̄a wau ojoq̄nsib olo wau bei q̄a are q̄alo-saieq̄nub. Nanġi q̄otq̄ajq̄a wau segi ojeq̄nub. Deq̄a nanġo gate a nanġi q̄a tulaṅ areboleboleiyeq̄nu.

⁵ Tamo bei bei wo gurgurosib bubuṅosib bei na bei buṅyosim di a awai oq̄as. A ururq̄ajq̄a kumbra ḡeregere dauryq̄asai di a awai oq̄asai.

⁶ Tamo bei a wauosim iṅġi yagwas di iṅġi meliamq̄a a osim uyq̄as. Deq̄a tamo laṅaj bei a namoq̄na bosim iṅġi uyq̄asai.

⁷ O Timoti, ijo anjam e ni mermeq̄num q̄aji endi ni q̄usim ino areq̄aloq̄ di siṅġilatime. Yimq̄a Tamo Koba a na powo emimq̄a ni ijo anjam kalil endi ḡeregere poimq̄as.

⁸⁻⁹ Ni gaigai Yesus Kristus q̄a are q̄aloq̄ne. A moisiq̄ olo subq̄ na tigelej. A Mandor Koba Devit aq̄a moma. E aq̄a anjam bole palontoq̄nsim laq̄nam jeu tamo nanġi na e tamo uge bul nuboq̄nsib gulbe koba eboq̄neb. Deq̄a nanġi na e ojsib tonto talq̄ endi waibeb unum. Ariya nanġi Qotei aq̄a anjam getentq̄a keresai.

¹⁰ E tamo uṅgasari Qotei na giltnjrej q̄aji nanġi q̄a are q̄aloq̄nsim gulbe kalil q̄oboiyeq̄num. E degyeq̄num. Di kiyaq̄a? Qotei na nanġi elenjamq̄a nanġi Kristus Yesus aq̄a ñam na ṅambile osib a ombla so bole gaigai sq̄ajq̄a deq̄a.

¹¹ Qotei aq̄a anjam bei unu. Anjam di gisaṅ sai. Anjam di bole. Deq̄a iga gago areq̄aloq̄ di

singilatqa kere. Anjam agiende.

“Iga Yesus ombla moyobulem deqa iga a ombla olo nambile gaigai sqom.

¹² Iga gulbe kalil qoboiyoqnsim singila na tigel-sqom di mondon iga Yesus ombla mandor kokba sqom.

Iga a qoreiyqom di a na kamba iga qoreigwas.

¹³ Iga aqa anjam dauryqa marsimqa olo dauryqa uratqom di Yesus a segi aqa anjam uratqa keresai. A dauryoqnsim sqas.”

Pol na Timoti minjej, “Ni Qotei aqa wau tamo bole soqne”

¹⁴ O Timoti, Kristen nanji ijo anjam deqa are walnjraim deqa ni na gaigai minjroqne. Osim Qotei aqa namgalaq di nanji endegsim minjroqne, “Ninji anjam qudei qa lanja lanja njirinoqnaib. Osib nam qudei qa anjam na qotoqnaib. Anjam dena ninji aqaryaingwa keresai. Ninji anjam di qusib dauryqab di nunjo areqalo niñaqesqas.”

¹⁵ O Timoti, ni Qotei aqa wau tamo boledamu sosimqa aqa anjam bole geregere palontoqnqajqa singilaoqne. Yim Qotei a ino wau kalil qa tulan arearetoqnqas. Deqa ni aqa namgalaq di jemaimqasai.

¹⁶ Tamo qudei nanji anjam uge lanja lanja marelejeqneb deqa ni nanjo anjam di qoreiye. Nanjo anjam di tulan ugedamu. Anjam dena tamo ungasari nanji are prugtetnjroqnm nanji Qotei aqa kumbra torei uratoqnqab.

¹⁷ Anjam di yu uge bulosim tulan kobaqujasim tamo ungasari nanji ugeugeinjroqnqas. Tamo

aiyel anjam uge deqaji mareqnub agi Himeneus Filetus wo.

¹⁸ Nanği aiyel anjam bole qa gam uratosib gisañ anjam endegsib mareqnub, “Tamo unğasari kalil nanği nami subq na tigeleb koboej. Deqa nanği olo bunuqna subq na tigelqasai.” O Timoti, gisañ anjam dena tamo unğasari qudei nami Yesus qa nanğo areqalo siñgilateb qaji nanğo areqalo olo niñaqyetnjreqnu.

¹⁹ Qotei aqa segi tamo unğasari nanği tal ai bu-losib siñgila na tigelejunub. Tal aiq di Qotei aqa anjam endegsib nenğrenyeb unu, “Tamo Koba a aqa segi tamo unğasari nanği qa qalie bole.” Anjam bei dego tal aiq di nenğrenyeb unu, “Tamo kalil Tamo Koba aqa ñam ejunub qaji nanği kumbra uge uge qoreiyebe.”

²⁰ E yawo anjam bei mermqai. Tal kobaquja bei miligiq di tabir qudei gol na ti silva na ti gereiyeb. Tabir qudei ñamtañ na gereiyeb. Tabir qudei jagi na gereiyeb. Tabir qudei wau bole qa gereiyosib olo tabir qudei wau kiñilala qa gereiyeb.

²¹ Deqa tamo bei a kumbra uge kalil uratosim Qotei aqa ñamgalaq di une saiqoji sqas di a tabir wau bole qa gereiyeb qaji di bul sqas. Deqa a ñam bole osim Qotei aqa segi kumbra boleq di sosim Gate Koba Yesus geregere wauetoqnqas. A wau bole kalil yoqnqajqa tulañ kere na sqas.

²² Deqa Timoti, areqalo uge uge anğro wala nanği dauryeqnub qaji di ni na qoreiye. Osim ni kumbra bole yoqnqajqa wauoqnsim Qotei qa ino areqalo siñgilatqnsim tamo unğasari nanği qalaqalainjroqnsim lawo na soqne. Tamo unğasari

are bole ti sosib Tamo Koba aqa ñam na pailye-qnub qaji nanği ni ombla kumbra kalil di yoqniy.

²³ Tamo unğasari areqalo bole ti sosai qaji nanği nanari anjam laña laña mareleneqñub deqa ni nanğo anjam di quoqnaim. Ni qalie, anjam dena qoto ti ñirinğ ti tigelteqnu.

²⁴ Tamo Koba aqa wau tamo nanği anjam na qotoqñsib ñirinğqñaiyb. Nanği na tamo unğasari kalil nanği kumbra bole bole enjroqñsib Qotei aqa anjam plaltosib minjroqñebe. Tamo qudei na nanği gulbe enjribqa nanği deqa ñirinğaiyb. Nanği kamba olo kumbra lawo nanği osornjroqñebe.

²⁵ Nanği lawo na Qotei aqa anjam gotranğyo qaji tamo nanğo areqalo olo gereiyetnjroqñebe. Yim Qotei na nanğo are bulyetnjrimqa nanği aqa anjam bole poinjrim dauryqab.

²⁶ Nami Satan a tamo nanği di singila na ojeson-aqa nanği aqa anjam dauryoqñeb. Deqa Qotei aqa wau tamo nanği lawo na nanği tingitnjribqa nanği Qotei aqa anjam bole qa poinjrim olo areqalo bole osib Satan aqa bañq dena jaraiyosib sawa boleq di sqab.

3

Diño bati jojomoqñimqa tamo nanği kumbra uge uge yoqñqab

¹ O Timoti, ni endegsi poimem. Mondonğ diño bati jojomoqñimqa gulbe gargekoba mandamq endi brantelenğqab.

² Tamo nanği kumbra uge uge endeqaji yoqñqab. Nanği nanğo segi jejamu qa tulañ areboleboleinjroqñqas. Nanği silali koba oqajqa

are prugnjqroqnas. Nanqi nanqo segi ñam soqtoqnsib diqoqnsib ñirin anjam koba maroqnsib tamo nanqi misilinjqroqnaqab. Nanqi nanqo ai abu nanqo anjam gotranjqoqnaqab. Tamo qudei na nanqi aqaryainjqroqnaqab nanqi kamba olo nanqi qa are boleinqroqnaqasai. Nanqi Qotei aqa kumbra bole kalil qoreiyjqoqnaqab.

³ Nanqi qalaqalaiyo kumbra dauryqa uratoqnaqab. Nanqi ñirinjqoqnsib jeu atoqnsib olo jeu turyoqnaqasai. Nanqi yomu anjam gargekoba maroqnsib nanqo segi jeyamu taqatqajqa asginjqroqnas. Nanqi laña laña qotoqnsibqa tamo nanqi ñumoqnsib kumbra bole jeutoqnaqab.

⁴ Nanqi tamo qudei nanqi ugeugeinqroqnaqab. Nanqi urur kumbra uge uge yoqnaqab. Nanqi kumbra di yqajqa ulaoqnaqasai. Nanqi nanqo segi ñam soqtoqnsib mandam qa inqi inqi qa tulañ areboleboleinqroqnas. Nanqi Qotei qa yala arearetnjqroqnaqasai.

⁵ Nanqi laña babañ na Qotei aqa kumbra bole dauryobuloqnsib sqab. Kumbra bole aqa siñgila nanqi yala poinjqrasai. O Timoti, tamo deqaji brantqoqnaqab ni na nanqi beternjqraim. Torei uratnjqsim isaq gile.

⁶ Tamo deqaji nanqi kumbra uge endegyeqnaqab. Nanqi uña qudei nanqo tal miligiq giloqnsib nanqi walawalainjqroqnsib areqalo titetnjqreqnaqab. Uña nanqi di areqalo bole ti sosai. Nanqi une gargekoba yeqnaqab nanqo une dena nanqi siñgila na ojeqnaqab nanqi kumbra uge uge yqajqa are prugnjqreqnu.

⁷ Uña nanqi di gaigai qalie oqajqa are qaloqnsib ariya nanqi anjam bole aqa utru poinjqra keresai-

injreqnu.

⁸ Gisaŋ tamo naŋgi di Qotei qa naŋgo areqalo siŋgilatoŋsaieqnu. Naŋgo areqalo tulaŋ niŋaŋeju. Nami Janes Jambres wo naŋgi aiyel Moses jeutoqneŋ dego kere gisaŋ tamo naŋgi na Qotei aqa anjam bole jeuteqnu.

⁹ Ariya naŋgo kumbra di tulaŋ kobaqasai. Nami Janes Jambres wo naŋgi aiyel kumbra deqaji yeqnaŋqa tamo uŋgasari kalil naŋgi unoqnsib maroqneŋ, “Naŋgo kumbra di nanari.” Dego kere gisaŋ tamo naŋgi kumbra uge uge yoqniŋqa tamo uŋgasari kalil naŋgi unoqnsib maroqnaŋ, “Naŋgo kumbra di nanari.”

Pol na Timoti minjeŋ, “Ni Qotei aqa anjam siŋgila na ojesoqne”

¹⁰ O Timoti, ni nami e ombla soqnem deqa ijo anjam kalil e na plaltoqnem qaji di ni qalie. Ijo walwel ti ijo kumbra ti di ni qalie bole. E Qotei qa ijo areqalo siŋgilatoqnsim ijo are miligi dego gaigai siŋgilatoqnsim waukobaqnem. Osim tamo uŋgasari naŋgi qalaqalainjroqnsim siŋgila na tigeloqnsim gulbe qoboioqnem. Di ni qalie bole.

¹¹ Antiok qure ti Aikoniam qure ti Listra qure ti dia jeu tamo naŋgi na e kumbra uge uge ebeqnaŋqa e jaqatiŋ koba oqnem. Qure qureq di kumbra uge kalil e qa brantoqneŋ qaji di ni qalie. Ariya bati deqa Tamo Koba a na e aqaryaiboqnsiqa gulbe kalilq dena e oqnsiq taqal atoqneŋ. Deqa bini e bole unum.

¹² Ni qalie, jeu tamo naŋgi na tamo uŋgasari kalil Kristus Yesus beteryesosib Qotei aqa kumbra dau-ryqa siŋgilaeqnu qaji naŋgi ugeugeinjroqnaŋ.

¹³ Tamo uge uge nanği ti gisañ tamo nanği ti tulañ ugeoqnqab. Ugeoqnsib gisañ anjam gargekoba maroqnib Satan na kamba dego nanği olo gisa gisañjroqnqas. Yim nanžo kumbra di tulañ ugedamuqas.

¹⁴ Ariya Timoti, anjam iga nami ni mermonam qusim ino areqaloq di siñgilatam qaji di ni olo siñgila na ojesoqne. Ni iga qa bole qalieonum deqa ni degyoqne.

¹⁵ Nami ni anğro kiñala sosimqa ni Qotei aqa anjam nenğrenq di so qaji di qalieosim bosibosim agi qalieosim unum. Anjam dena ni powo bole emon-aqa ni Kristus Yesus qa ino areqalo siñgiltonamqa Qotei na ni padalo sawaq dena ej.

¹⁶ Qotei aqa anjam kalil nenğrenq di so qaji di Mondor a segi na babtej. Anjam dena iga aqaryaigoqnsiqa gam bole osorgoqnsiqa gago areqalo tingitetgeqnu. Osiqa gago walwel gereiyetgoqnsiqa iga kumbra bole dauryqajqa siñgilatgeqnu.

¹⁷ Deqa anjam dena Qotei aqa tamo unğasari nanği keretnjreqnaqa nanği kumbra bole kalil yoqnsib wau bole bole ojeqnu.

4

Pol na Timoti minje, “Ni Yesus aqa anjam palon-tqajqa tulañ siñgilaoqne”

¹ Qotei aqa Njiri Kristus Yesus wo nanžo nğamgalaq di e ni siñgila na endegsi mermqai. Mondon Yesus a lañ qureq na brantosim tamo unğasari kalil nğabile so qaji nanği ti nami moreñeb qaji nanği ti peginjrğas. Osim a bati gaigai Mandor Koba sqas.

² Deqa ni Yesus aqa anjam palontoqne. Tamo ungasari nanngi ino anjam quqwa arearetnjroqngas kiyo asginjroqngas kiyo di unqum. Ni na nanngi tingitnjroqnsim dalnjroqnsim are tigeltetnjroqne. Ni asgimaiq.

³ O Timoti, ni que. Bunuqna tamo gargekoba nanngi Qotei aqa anjam quqwa asginjroqnmqa olo anjam utru bei bei quqwajqa are prugnjroqngas. Osib nanngo segi areqalo dauryosib anjam plalto tamo qudei nanngi metnjroqrib bosib gisanj anjam minjroqrib qusib arearetnjroqngas.

⁴ Deqa nanngi anjam bole quqwa uratosib lanja sa anjam quqwajqa dab atoqngab.

⁵ Ariya Timoti, ni kumbra degyaim. Ni gaigai areqalo bole na sosimqa gulbe ti jaqatin ti qoboiyoqne. Osim ni na Yesus aqa anjam bole tamo ungasari nanngi minjre minjre laqne. Ni nanngi aqaryainjrqaajqa wau ti unum deqa ni wau di keretosim yoqne.

Pol a moiqa bati jojomej

⁶ Ni qalie, jeu tamo nanngi na e lubsib moiyoqbqa bati jojomqo. Israel nanngi wain bilentoqnsib Qotei atraiyeqnbub dego kere e moisiyqa ijo leñ aiqas qaji dena Qotei atraiyobulqai.

⁷ Tamo nanngi gurguroqnsib bubuñeqnbub dego kere e nami sinqila na ururosime Yesus dauryoqnem agi bini e degyeqnum. E ijo wau kalil kobotonum. E Qotei qa ijo areqalo sinqilatoqnem di e uratosaiqnem. Agi bini e ijo areqalo di sinqila na ojejunum.

⁸ Tamo nanngi gurguroqnsib bubuñeqnbub di nanngi awai oqajqa. Ijo awai bole agi Qotei a lanj

qureq di atej unu. E awai di oqajqa tariñoqnsim unum. Ijo awai agiende. Mondonj Tamo Koba a na e tamo bole une saiwoji qa merbqas. Di ijo awai bole. Tamo Koba a kumbra bole tintinj na tamo unqasari nanji peginjrqas. Peginjrqas bati deqa a awai bole di e ebqas. A e segi awai ebqasai. Tamo kalil Yesus a lanj goge na brantim unqajqa deqa areboleboleinjreqnu qaji nanji dego awai bole enjrqas.

Pol na Timoti minjej, “Ni ijoq urur au”

⁹ O Timoti, ni ijoq urur au.

¹⁰ Ni que. Demas a mandam endeqa kumbra qa tulanj areareteqnu. Deqa a na e uratbosiqa Tesalonaika qureq gilej. Kresens a Galesia sawaq gilej. Taitus a Dalmesia sawaq gilej.

¹¹ Aqo Luk wo segi unum. Deqa ni Mak osimqa endeq boiy. Mak a tamo bole. A na e aqaryaiboqnsiqa wau bole yeqnu.

¹² Tikikus agi e na qarinyonam Efesus qureq aiyej.

¹³ Ni ijoq bqa osimqa ijo gara jugo Troas qureq di uratem qaji di osim osau. Agi Karpus aqa talq di uratem unu. Ijo buk qudei dego osau. Ariya ijo pepa lulumo qudei wagme nanjo jegara na gereiyo qaji di dego osim osbetbe. Ni are walmaiq.

¹⁴ Bras na inji inji gereiyo tamo aqa ñam Aleksander a na e ugeugeiboqnej. Deqa mondonj Tamo Koba a na kamba Aleksander ñolawotqas.

¹⁵ Aleksander a nami iga jeutgoqnsiqa gago anjam tulanj ugeugeiyoqnej. Deqa ni a qa geregere ñam atoqne.

¹⁶ JEU tamo nanġi nami e ojsib anjam pegiyo talq di tigeltbeb bati deqa tamo bei na e taqbosai. Tamo kalil nanġi e uratbosib jaraiyeb. Deqa e Qotei endegsi pailyem, “O Abu, ni nanġo une deqa olo kambatnjraime.” E degsi Qotei pailyem.

¹⁷ Ariya Tamo Koba Yesus a segi na e taqbosiqa sinġila ebej deqa e anjam pegiyo talq di tigelosim Yesus aqa anjam bole mareqnamqa sawa bei bei qaji nanġi quoqneb. Qotei na e aqaryai-bosiqa baun juwan nanġo medabuq na e osiq taqal waibej.

¹⁸ Deqa e endegsi qalieonum. JEU tamo nanġi boqnsib kumbra uge uge ebqa maroqneb Qotei na e aqaryaiboqnsim nanġo banq dena e oqnsim taqal waiboqngas. Osim bunuqna a na e lan qureq osi oqsim dia e taqatbosim ijo Mandor Koba sqas. Deqa iga bati gaigai aqa ñam soqtoqngom. Bole.

¹⁹ O Timoti, ni na ijo kaiye anjam endi osim tamo nanġi Onesiforus aqa talq di unub qaji nanġi ti Prisila Akwila wo nanġi koba na minjime.

²⁰ Erastus a Korin qureq di unu. Trofimus a Miletus qureq di ma ti sonaq e na uratem unu.

²¹ Ni ijoq urur boqujat. Ni tariñoqnim ulili bati bo uge.

Yubulus na Pudens na Linus na Klodia na nanġi qolqe Kristen tamo kalil nanġi ti koba na kaiye anjam endi inoq qariñyonub.

²² Tamo Koba a na ino qunun geregere taqateme. Osim niñgi kalil qa are boleiyeme. Bole.

Yesus Aqa Anjam Bole 2000
The New Testament in the Anjam language of Papua
New Guinea, 2000 edition
Nupela Testamen long tokples Anjam long Niugini,
2000

Copyright © 2000 The Bible Society of Papua New Guinea

Language: Anjam

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2001-01-01

PDF generated using Haiola and XeLaTeX on 18 Apr 2025 from source files dated 31 Aug 2023

6bd977a8-0139-583b-a367-c04faf6223cc